



Broj: 06-05-13545/17
Sarajevo, 05.04.2017. godine

SKUPŠTINA KANTONA SARAJEVO
-OVDJE-

n/r Predsjedateljica Ana Babić

Predmet: Odgovor na zastupničko pitanje zastupnice Mersihe Mehmedagić, dostavlja se

Zastupnica Mersiha Mehmedagić je na 26. Radnoj sjednici Skupštine Kantona Sarajevo održanoj dana 22.03. 2017. godine u okviru tačke Dnevnog reda „Zastupnička pitanja, inicijative i odgovori“, a u skladu sa Poslovníkom Skupštine Kantona Sarajevo, postavila zastupničko pitanje:

„ Molim Ministarstvo privrede i Ministarstvo za boračka pitanja da mi dostave izvještaje o utrošku sredstava za pozicije „Podsticaj razvoju male privrede“ i „Transfer za poticaj zapošljavanja branilaca i članova njihovih porodica“ za 2016.godinu, te u sklopu izvještaja odgovore na slijedeća pitanja:

- Sa kim su potpisani ugovori i po kojim uslovima?
- Koje su obaveze ugovornih strana?
- Koliko novih radnih mjesta je obezbjeđeno implementiranjem navedenih sredstava?“

Na postavljeno zastupničko pitanje dajemo slijedeći

ODGOVOR

Vlada Kantona Sarajevo je svojim zaključkom broj: 02-05-3630-6/16 od 11.02.2016.godine prihvatila Program za poticaj za zapošljavanje boračke populacije u Kantonu Sarajevo za 2016. godinu.

Navedenim Programom predviđena je realizacija niza mjera čiji je opći cilj doprinos povećanju podrške u resocijalizaciji boračke populacije putem njihove integracije na tržište rada povećanjem mogućnosti za njihovo zapošljavanje, kako bi se i uz druge programe ove vrste i aktivne mjere zapošljavanja u Kantonu Sarajevo moglo utjecati na stvaranje uvjeta za zapošljavanje ovih ranjivih kategorija. **Poseban cilj Programa je poboljšati pristup tržištu rada i stvoriti minimalne uvjete za zapošljavanje i samozapošljavanje boračke populacije, čime bi se povećala konkurentnost ovih lica na tržištu rada.**

U cilju realizacije opće mjere broj 1. – „Mjera podsticanja nezaposlenih iz reda boračke populacije da prepoznaju šansu koju pruža zapošljavanje putem zadrugarstva. Animiranje će se vršiti putem boračkih udruženja i aktivnostima Ministarstva za boračka pitanja kroz organizaciju savjetovanja, seminara, radionica i pružanje neposredne pravne i druge stručne pomoći, organiziranja razmjene iskustava, dobre prakse i inovativnih pristupa za unapređenja uslova zapošljavanja boračke populacije“, do danas su održane dvije radionice u organizaciji Ministarstva za boračka pitanja.

Prva radionica održana je 27.01.2016.godine u Multimedijalnoj sali Kantona Sarajevo na kojoj je Stručni tim za izradu Programa zapošljavanja pripadnika boračke populacije imao prezentaciju pod naslovom „ Edukacije za formiranje boračkih zadruga“, te prezentaciju pod nazivom „Prednosti zadruge u odnosu na druge organizacione oblike“ koju je prezentirao Zadružni savez FBiH.

Druga radionica održana je dana 09.03.2016.godine na kojoj je prezentirana tema: „Program mjera za poticaj zapošljavanja boračke populacije u Kantonu Sarajevo za 2016. godinu“ od strane Stručnog tima. Gost prezentator na ovoj radionici bio je Muhamed Softić iz Udruženja poljoprivrednika Vogošća sa temom: „Tuneli za kornišone – proizvodnja i distribucija kornišona“. Interes za radionice bilo je veliki i istima su prisustvovali interesenti iz reda boračke populacije za pokretanje vlastitog biznisa ili za formiranje boračkih zadruga.Od strane učesnika ove radionice su ocjenjene kao veoma uspješne. Osim navedenog svakodnevno se daju pravni savjeti intresentima za osnivanje zadruga u okviru ljudskih resursa Ministarstva, a također su svim zainteresiranim dostupni primjeri dokumenata potrebnih za osnivanje zadruge izrađeni od strane Stručnog tima.

U okviru realizacije ove mjere odobrena je i konkretna pomoć na ime podrške boračkog zadrugarstva BPTU „Prva boračka – Plodovi Bosne“ po projektu odobravanja sredstava za sjetvu sa iznosom 4.000,00 KM. JOB Unija Veterana podržan je sa projekatom podsticaja zapošljavanja pripadnika boračke populacije kupovinom šest kazandžijskih mašina, u iznosu 3.500,00 KM.

Realizacija opće mjere 2. – „ Mjera samozapošljavanja kroz projekat podizanja zasada maline koji će sufinansirati Ministarstvo za boračka pitanja“ i mjere 4. – „ Mjera nabavke i distribucije plastenika za pripadnike boračke populacije koji ispunjavaju uvjete za plasteničku proizvodnju“, započeta je objavom Javnog poziva za podizanje zasada maline i nabavku plastenika u dnevnom listu „Dnevni avaz“ 25.02.2016. godine. Javni poziv za prijavu zainteresiranih kandidata iz reda boračke populacije trajao je do 17.03.2016. godine, nakon čega je Stručni tim pristupio prvoj fazi procesa odabira, a to je administrativna usklađenost prijave.

Potom se pristupilo drugoj fazi procesa odabira, a to je terenski uviđaj i proojena parcele podnositelja. Za obavljanje ovog posla angažovana je stručna terenska komisija u čijem sastavu su mr. agronomije i dipl.ing.agronomije oboje šehidska djeca. Komisija je na terenu provjeravala tačnost podataka datih u zahtjevu i tamo gdje je utvrdila da je stanje istinito, naložila je podnosiocu zahtjeva da dostavi pedološku analizu uzoraka zemljišta sa parcele koja mora biti urađena kod nadležne institucije.

Nakon završetka ove faze, raspisivan je tender u skladu sa propisima iz oblasti javnih nabavki, kako bi se u skladu sa zakonom izvršila nabavka certificiranih zasada maline, sustava za navodnjavanje i plastenika.

Po tenderu su izabrane 2 firme na 3 raspisana lota i to za:

- LOT 1 nabavka,transport,isporuka i montaža plastenika firma OPPPUZ „BIOS“ d.o.o Visoko,
- LOT 2. i 3. nabavka,transport,isporuka i montaža sistema za navodnjavanje kap po kap i za nabavku, transport i isporuku sadnica maline firma „ITC“ d.o.o Zenica.

Nakon završene tenderske procedure prisupilo se potpisivanju pojedinačnih ugovora sa korisnicima.

Ovim ugovorom reguliraju se prava i obaveze ugovornih strana u vezi sa implemetancijom Konačne Odluke ministra o listi kandidata za ostvarivanje poticaja iz Programa mjera za poticaj zapošljavanja boračke populacije u Kantonu Sarajevo za 2016.godinu broj: 06-14-5425-K1/16 od 25.05.2016 godine, Dodatne Odluke broj: 06-14-5425-K2/16 od 07.07.2016 godine i Dodatne Odluke broj:06-14-5425-K3/16 od 08.08.2016 godine.

Maline:

Korisnicima je odobrena je dodjela 2000 sadnica maline za površinu zemljišta od 2000 m² na lokaciji korisnika predviđenoj za sadnju maline, na kojoj je izvršena analiza zemljišta i koju je obišla Stručna komisija Ministarstva. Vrijednost dodjeljenih sadnica certificiranih marke Vilamet iznosi 1872,00 KM sa uračunatim PDV-om po korisniku.

Korisniku je također dodjeljivan i sistem za navodnjavanje malina kap po kap za površinu 2000 m² sa svim potrebnim priljučcima i otvorenim bačvama od 1000 l. Vrijednost dodjeljenog sistema za navodnjavanje iznosi 875,90 KM sa uračunatim PDV-om po korisniku.

Ministarstvo zadržava pravo da u svakom trenutku zatraži podnošenje izvještaja o realizaciji projekta i namjenskom korištenju dodjeljenih sredstava, odnosno izvrši nadzor neposredno na terenu.

Korisnik sredstava se obavezuje da će:

- obaviti sadnju u jesenskom sadnom roku dodjeljenim certificiranim sadnicama maline marke Vilamet,
- pri korištenju dodjeljenih sredstava pridržavati se važećih zakonskih i podzakonskih propisa,
- nakon realizacije odobrenih projekata ili aktivnosti, najdalje u roku od 30 dana od dana završetka projekta o realizaciji izvjestiti Ministarstvo, i da će omogućiti Stručnoj komisiji formiranoj od strane Ministarstva da neposredno na terenu konstatuje stanje realizacije sadnje,
- kao nezaposlena lica kojima je odobren ovaj poticaj po isteku 36 mjeseci od potpisa ovog ugovora, brisati se sa evidencije nezaposlenih osoba.

Plastenici:

Korisniku će biti odobrena dodjela plastenika površine 50 m², širine 5 m, visine 2,5-2,8 m i dužine 10 metara, sa garancijom dobavljača na konstrukciju plastenika bez fizičkih oštećenja i opterećenja od 5 godina. Plastenik se postavlja na lokaciju Korisnika, na kojoj je izvršena analiza zemljišta i koju je obišla Stručna komisija Ministarstva. Vrijednost dodjeljenog plastenika iznosi 1338,99 KM sa uračunatim PDV-om po korisniku.

Ministarstvo zadržava pravo da u svakom trenutku zatraži podnošenje izvještaja o realizaciji projekta i namjenskom korištenju dodjeljenih sredstava, odnosno izvrši nadzor neposredno na terenu.

Korisnik sredstava se obavezuje da će:

- dostavljeni i montirani plastenik koristiti u svrhe za koje je namjenjen,
- pri korištenju dodjeljenih sredstava pridržavati se važećih zakonskih i podzakonskih propisa,
- nakon realizacije odobrenih projekata ili aktivnosti, najdalje u roku od 30 dana od dana završetka projekta o realizaciji izvjestiti Ministarstvo, i da će omogućiti Stručnoj komisiji formiranoj od strane Ministarstva da neposredno na terenu konstatuje stanje realizacije plasteničke proizvodnje,
- kao nezaposlena lica kojima je odobren ovaj poticaj po isteku 36 mjeseci od potpisa ovog ugovora, brisati se sa evidencije nezaposlenih osoba.

Ugovor za sadnice maline i sistem za navodnjavanje potpisalo je 18 korisnika, a za plastenike njih 57.

Realizacija opće mjere broj 3. – „Mjera aktivnog traženja poslovnih partnera na tržištu za otkup gotovih proizvoda nastalih kao rezultat realizacije Mjere 2. ovoga Programa i posredovanje Ministarstva između subjekata zaineresiranih za otkup i neposrednog proizvođača“, je kontinuirani zadatak Ministarstva za boračka pitanja. U cilju realizacije ove mjere razmotreni su i prezentirani zainteresiranim subjektima uvjeti za otkup maline i drugog bobičastog voća od firme „Klas“ d.d.

Sarajevo. U više navrata održani su sastanci sa firmom „Eko Plod“ d.o.o Sarajevo, koja je izrazila spremnost za otkup ukupne količine proizvedenog bobičastog voća od strane naših kandidata. Upriličen je radni sastanak i sa firmom „Agrona“ d.o.o Tuzla koja je iskazala spremnost otkupa kornišona pod uvjetom organizirane proizvodnje istih pod njihovim uvjetima, sa obezbjeđenom edukacijom i podsticajem od strane firme.

Posebne mjere:

„1. Medijska prezentacija mjera iz Programa

2. Mjera podizanja svijesti šire javnosti o radnim sposobnostima lica iz ciljne grupe, jačanje njihovi kompetencija i poduzetničkog potencijala kroz zadruge kao i razine svijesti poslodavaca o prednostima saradnje sa boračkom populacijom s ciljem postizanja njihovog ravnopravnog sudjelovanja na tržištu.

3. Mjera organizacije prigodnih prezentacija proizvoda postojećih boračkih zadruga i boračkih firmi u okviru programa obilježavanja značajnih datuma, događaja i ličnosti“,
provode se kontinuirano i u više navrata javnost je detaljno upoznata sa sadržajem ovog programa i njegovim ciljevima.

Realizacija posebne mjere broj 3. upriličena je 17. 05. 2016. godine u 13 h, izložbom suvenira koji su namjenjeni njegovanju tradicije odbrambeno-oslobodilačkog rata 1992.-1995., kao i prodaji u postojećim suvenirnicama, u prostorijama restorana „Izvor Bosne“ koji je vlasništvo boračkog udruženja RVI Ilidža. Ova izložba je rezultat zajedničkog djelovanja ovog boračkog udruženja i dvije boračke zadruge „Veteran“ i „BiH Art“ sa područja općine Ilidža.

Bužetska sredstva koja su utrošena za realizaciju ovo programa sa pozicija Ministarstva za boračka pitanja iznose ukupno 137.441,44 KM, od čega za nabavku platenika 74.983,44 KM, za nabavku malina 17.518,00 KM, za nabavku sustava za navodnjavanje 37.440,00 i za podršku zadrugama 7.500,00 KM.

Obradio:

Kontrolisala: mr.



MINISTAR

mr. Muharem Fišo

Dostaviti:

- Predsjedateljica Skupštine Kantona Sarajevo,
- Sekretaru Skupštine Kantona Sarajevo,
- Sekretaru Vlade Kantona Sarajevo,
- a/a.